

Kontrola ko saobračajno komiteti

Ako tu ja dijekh aver manuš hine ko jekh saobračajno incidenti, o saobračajno komiteti ka čerel kontrola ki kompenzacia so dela o osiguranje ako phagljen pro, čang, vas ja dišo aver. I blanketa hem o procesi tane ki Švedsko čhib hem bizo pare. I konstatacia so dela o komiteti tano jekh savet baš o osiguranje. O komiteti čerela kontrola ko duj tipija situacije; obavezno tipi hem procesno tipi. Akija informacia akate tani baš o procesno tipi.

Procesno tipi

Ako tu dobijan odluka kotar to osiguranje baš i kompenzacia, ama na hijan zadovoljno, tegani šaj te rode o saobračajno komiteti te čerel kontrola upri odija odluka. Akija situacia ovela procesno tipi.

Da li šaj me kokri te pisnav i blanketa, o komiteti te čerel kontrola?

Angljeder sa, o osiguranje valjani te anel jekh odluka hem ako tu na hijan zadovoljno valjani te khuve ko kontakti oljencar hem te probine o osiguranje te promini odija odluka. Ako o osiguranje na promini i odluka, tegani šaj te bičhalje i blanketa ko komiteti te čerel pe jekh kontrola upri odija odluka.

Primer ko pučiba kote so šaj te čerel pe kontrola:

- Ako i dukh isi tut sebepi o saobračajno incidenti
- O nivo kotar medicinsko invaliditeti palo o incidenti
- Ekonomsko minus palo o incidenti
- Ako o pučibe hem i situacia purandilje

Organizacia kotar o saobračajno osiguranje

Ako tani ti situacia ko procesi ki organizacia kotar o saobračajno osiguranje (Trafikförsäkringsföreningen, TFF) tegani tu našti direktno te kontaktirine o saobračajno komiteti. Ako na hijan zadovoljno oljengere odlukaja, tegani šaj o komiteti te čerel kontrola. Tu valjani te kontaktirine o TFF so ka bičhalji o procesi te ovel ko komiteti te čerel i kontrola. O TFF ka bičhalji tuče i konstatacia so čerđa o komiteti.

Sar čerela pe i kontrola?

1. Tu šaj te prijavine ko komiteti digitalno ja te bičhalje o pherdo formulari prekalj pošta. O formulari ka arakhe ki oficialno internet strana, www.trafikskadenamnden.se. Tegani valjani sar dokumenti te čhive hem i odluka so anđa o osiguranje. Šaj ka valjani te kompletirine pana materialeja hem dokumentencar.
2. O slučaj ka ovel registririmo hem tegani ka dobine potvrda. Tu šaj te pratine sa digitalno ko "Mina sidor" ki oficialno internet strana, www.trafikskadenamnden.se ako isi tut BankID. Ako nane tut, tegani i komunikacia ka ovel prekalji pošta.
3. O osiguranje ka bičhalji po komentari ko komiteti ki tiklji prijava. Tegani o osiguranje hem mothovi sose anđa esavki odluka.

4. Ked tu dikhljan sa o materiali, tegani ka dikhe isto ako valjani te kompletirine disovaja. Tu šaj te kompletirine disovaja so več to osiguranje dikhlja. Ako tu bičhaljeja jekh nevo dokumenti kotar doktori, tegani hem to osiguranje mora te dikhel odova.
5. O komiteti čerela kontrola hem pisini i konstatacia.
6. Odova ka ovel bičhaldo tuče hem ko to osiguranje.

Tu šaj te cide napalal i prijava so čerđan ko komiteti bilo keda đi trajini o procesi.

Kobor vreme ka doljel o komiteti te čerel i kontrola?

Keda i komunikacia maškaro tute hem to osiguranje završinda, tegani o komiteti ka čerela i kontrola ko rok kotar 90 dive. Ko disave situacije o rok šaj te ovel pobaro kotar 90 dive.

Ki savi čhib ka ovel o procesi?

O procesi hem i kontrola ko komiteti ka ovel ki Švedsko čhib.

Da li šaj te ovel man advokati?

Tu šaj te ovel tut jekh advokati so ka pomožini tut ko procesi, ama odova nane obavezno. Ako tu mangeja te ovel tut jekh advokati o osiguranje ka anel odluka da li šaj odova te platini pe. Ako našti, tu valjani kokri tegani te platine e advokate hem te de oljese punomoč.

Da li šaj te ovav othe ked o komiteti ka čerel buti?

Tu hem to advokati našti te oven othe ked o komiteti ka čerel buti. I kontrola o komiteti ka čerel ki pisimi forma.

Da li o osiguranje mora te čerel odova so phenela o komiteti?

O komiteti dela jekh konstatacia ki pisimi forma sar jekh savet. Sebepi so i konstatacia tani sar savet, o osiguranje nane obavezno te čerel sar o komiteti so phenela. Ama, ko but situacije o osiguranje šunela hem čerela so phenela o komiteti.

Da li šaj te mukhav žalba?

Tu našti te mukhe žalba ki konstatacia so anđa o komiteti. Ako tu na hijan zadovoljno savi konstatacia anđa o komiteti ja ako to osiguranje na mangela te promini i odluka, tu šaj celo akija situacia te prijavine ko sudo. Ko sudo šaj i odluka so o osiguranje anđa te dikhel pe podetaljno, a na i konstatacia so o komiteti anđa. Isi šansa hem o pravilo kotar i preskripcia te ovel aktivno. Baš i pobuter informacia so važini ki esavki situacia, valjani te kontaktirine to osiguranje.

Pobuter informacia isi ko www.trafikskadenamnden.se